

武英殿聚珍版丛书

天

地

人

物

事

理

法

道

文恭集卷二十二

宋

胡

宿

撰

內制

皇兄允弼特授依前檢校尙書右僕射充寧國軍
節度使同中書門下平章事北海郡王加食邑一
千戶實封三百戶仍賜推誠保順亮節守正翊戴
功臣制

門下稽若先王制茲大禋謂四時之常祭未極孝思約
一閨之小成誕爲精享朕詳按舊禮攷卜孟冬駕言屬

車登享祖廟行朝踐之禮歌長發之章惟時親賢預我
祠祀盡肅雍之美同悽愴之懷亦旣解嚴宜有褒賞用
敷渥典式告大廷具官允弼地則茂親時惟明德繫二
南之化躬兩漢之風表儀王家有嚴重之質導訓宗子
得祗穆之和兼徽台司開賦王社宿邸彌謹奉朝滋恭
而自先甲肇禋申嚴始事率郇滕之諸國逮魯衛之密
親侍齋幄之深從昭鑾之近太室戾止廣樂繹如奉亞
裸之升極其恭志正赤舄之履亶無流心祖宗格思祝
嘏告止歆乃孝享賜朕祥釐膾肉是頒用先兄弟之愛

勞酒斯舉以澤公侯之勤優衍采田益疇真食仍加功
號之美竝昭名數之華國典攸宜家情允洽於戲同寅
恤祀旣獲無疆之休夾輔慎徽益保有終之吉往欽厥
命永孚于休

除皇弟允初特授特進依前檢校尙書右僕射使
持節耀州諸軍事行耀州刺史兼御史大夫充感
德軍節度使耀州管內觀察處置等使加食邑七
百戶仍賜推誠保順翊戴功臣制

門下百世必祀德厚者流光三歲乃洽文繁則禮縟朕

訓四海之孝合七世之靈因時永懷備物親享祲容粢
若寶鎮在焉來九服之朝用六代之樂于時藩岳伯舅
二三弟兄助祭在茲侍祠有恪嘉饗云究慶賜遂行具
官允初體韻詳和性質淳固本賢王之後資聖源之先
遙制侯藩委高牙之重畱宿京邸奉介圭之朝能慕善
猷綽有淑問自祖宗之講祀由奉常以肄儀結佩入齋
展軫從蹕清廟在望極駿奔之恭朱芾侍祠有肅雍之
美朕以皇祖右饗大嘏告茲熙事備成景福來格還衡
肆眚進律疇庸乃眷戚藩益開土宇仍進表功之號更

升躡等之階恩禮之隆固先于異姓名數之懋滋表于
展親於戲承積累之祥膺節制之重齋祠參奉靈寵洊
加益慎爾猷往服朕命

除皇弟允良特授特進依前檢校司空同中書門
下平章事使持節鄭州諸軍事行鄭州刺史華原
郡王充奉寧軍節度使鄭州管內觀察處置河隄
等使加食邑一千戶仍賜功臣制

門下朕沿康復之慶薦昭報之誠合祀乾祇大陳牲玉
先期祓乎路寢申詔約乎郊邱禮文昭明儀體簡大旣

執量幣獲侑祖宗之靈復因祭膳以親兄弟之國蓋合
揚于貺施用均布于福釐矧堯之變時雍始于敦族而
周之厚民德由厥睦親式是仁恩揚茲慶號具官允良
姿質淑茂體行端莊令問夙昭善猷允履戚藩云建使
節是持按圖啓封載擇膏腴之地班槐就列兼崇台宰
之儀入侍齋祠居奉朝請有陟恪之敏得雍肅之和朕
享告成爾庸惟穆旣飲斯至乃澤厥勞鄭伯列于近郊
滕侯先于異姓班茲盛策進以崇階仍增井牧之封益
寵雲臺之號竝爲異數用洽至恩於戲訖是上儀布茲

大喜羣工庶尹旣國典之是孚至戚密親在家情之允洽益慎爾德以對厥休

除富弼行禮部尙書同中書門下平章事昭文館大學士監脩國史兼譯經潤文使加食邑實封功臣散官勲封制

門下中樞治本裁教化之宜上相台光長官師之任用緝熙于百度資燮正于三階眷乃右垣時惟哲匠委政事而已試攷名實以相符誕揚大庭付畀魁柄具官富弼任重道遠性正德全閎敏推于上才博洽通于衆志

撓之不濁偉量表于彌沖簡而易從盛業彰乎可大首
膺魁壘之舉歷踐禁嚴之塗蹇諤發于爾躬啓沃盈于
朕聽歸由樞省出殿藩房名聲聳于遠夷風采繫于諸
夏遂膺枚卜實契具瞻朝有偉人物無異論持重守正
參濟以和告猷納忠一本于治屬以冢卿謝政首鉉佇
能諏俊乂之大臣疇若予采冠丞疑之上席僉曰汝賢
是用升自政塗處以師尹仍進秩宗之重復兼史觀之
名衍以優封昭茲異數用旌茂諒允穆師言於戲播化
鈞而理陰陽操國柄而撫辰象惟無心故能感物惟以

虛所以受人格于太和繫我真宰往踐乃位同孚于休
除王貽永授依前檢校太師行尙書右僕射兼侍
中充景靈宮使彰德軍節度使加食邑實封改賜
功臣制

門下升庸進等蓋裒德之彝章均逸待勞乃優賢之茂
典眷言俊老久總繁機乃圖宣翼之勤俾遂偃休之請
對加尊秩改治靈宮諏以剛辰告于列位具官王貽永
志懷明劭識宇沖深逮事及于先朝得尙榮于舊館用
絳侯賢子之譽入纘世功以征南武庫之才擢居師列

粵予紹宅之始嘉乃榦方之能召置機庭掌我兵柄周旋一紀密勿萬微慕安世之典機本于周慎猶韓增之領事濟以寬和又牧政而脩明總武經而練達納忠匪懈宣力罔遺遂兼台階仍冠樞席常益附蟬之飾尋還浴鳳之聯抑乃榮章俞其謙請式是耆良之望深于眷倚之懷比閱封章聯辭機劇叙晦明之嬰恙因夙夜之肆勤閔茲高年累以煩事聽還溫省之務特寵殊庭之名益升右揆之崇復兼常伯之重進裒功之美號拓衍食之優封有嘉舊勲益昭異數於戲臣鄰之際貴保于

初終進退之間思全于休美勉綏遐福尙佇敏謀

除張堯佐特授光祿大夫依前檢校太保宣徽南
院使淮康軍節度使加食邑實封

門下祇脩郊報肅奉廟昭告虔前人裸鬱香之酒大旅
上帝颺樵燎之煙饌食洽于羣神助祭來于四海神人
感悅福嘏昭通樂與臣鄰均茲休祐睠惟近職時乃內
徽亟酬從蹕之勞參錄陪祠之劭用頒慶賜式示寵優
具官張堯佐履尙淑均器懷詳敏早會右文之治夙馳
居業之稱發策俊廷膺歛才之高選振纓公路達從政

之大方寢服近嚴稔更內外委典京之尹任峻司會之
使名總治要煩滋見計籌之善參圖勤濟進聯徽鉞之
崇有若孟津亶爲巨屏陪我京室控于河橋用繫帥節
之行出委戎翰之近憑熊成治卓馬來庭通文石之內
朝進班邇列陪甘泉之法從預相縟儀志力允嘉事爲
咸濟逮端門之還軫稽大寢之策勲崇以階聯拓茲井
賦允爲異數用示澤勞於戲郊爲國之上儀有繫敷贊
賞乃朝之茂典敢廢舊常往服褒嘉勉思欽慎

除曹佾特授依前檢校尙書左僕射充保靜軍節

度使加食邑制

門下朕曩嬰機務稍煩神明遂滌慮于大庭乃味道于
虛室吉祥來復剛健無虧開懌羣臣慰安億姓蓋二儀
之相沖子乃三后之翼曾孫惠我壽康繄茲保佑乃嚴
祕寢合祀大神以對越于天休用敷錫于朝慶藩岳以
職而來貢臣工執事而有嚴自齋濯以潔誠逮瘞燔而
訖事體容疊穆氣象晏溫驗休證之著然宜祥釐之錫
爾眷言侯度用舉寵章具官曹佺識局夷通志懷敏劭
夙稟德門之慶蔚爲戚畹之華入義府以敦詩時惟良

帥登太常而紀績世著大功無亞夫貴倨之風有陰興
謙退之行居則以列侯而就第善不近名出則以良翰
而守藩達于從政近易東秦之節俾臨舊許之邦撫是
寰封陪茲京室命書甫降祀典告成蓋圖守屏之勤參
錄充庭之上衍封爾宇加惠于朝進以茂勲疇其真賞
孚乃王庭之號用爲侯服之光於戲賞以勸其功祀以
報其貺惟前人之烈已頒誓于河山惟後昆之賢復纘
戎于茅瑞往服慶賜勉思忠規

除張茂實特授依前檢校工部尙書充寧遠軍節

度使勲封食邑制

門下朕曩以日中聽政夜分觀書雖禹湯求理之心未
嘗敢怠而黃老養性之術頗有所虧賴穹厚之惠康蒙
宗社之敷佑善氣來復吉履以強恭卽路朝述脩祀事
以虔大報用荅元祺藩岳底貢而畢臻神祇呈貺而胥
穆薦享之夕儀物粲然丹燎告升休景彌燭策勲有典
頒胙著文眷言戎翰之臣用孚庭號之慶具官張茂實
誠節果壯志度深沈濟美本于勲良好謀通于奇正習
安邊之將略善于拊循佐絕域之使才得其要領以忠